

BERNART ARNAUT DE MONCUC.

2701.

**E**n quan li rozier  
So ses flor ni grana,  
E'l ric menuzier  
An cassa per sana,  
M'es pres cossirier,  
Tan me platz lor tensa,  
De far sirventes;  
Car en viltenensa  
An tot bon pretz mes.

Ecar mai  
Me ten gai  
Amors que no fai,  
E'l bel temps de mai;  
Eras soi gai, cui que pes,  
Tals joi m'es promes.

Man caval corsier  
Veirem vas Tarzana,  
E vas Balaguiier,  
Del pros rei que s vana  
Qu'a pretz à sobrier.  
Venra ses falhensa  
Lai en Carcasses;  
Mas ges gran temensa  
Non an li Franses.

Mas ieu n'ai  
De vos sai,  
Domna; que m'esglai  
Lo desir qu'ieu n'ai  
Del vostre bel cors cortes,  
Complit de totz bes.

El l'armat destrier,  
Ausberc, lansa plana  
E bon bran d'acier,  
E guerra propdana,  
Pretz mai que lebrier  
Ni brava parvensa,  
Ni patz en qu'om es  
Mermatz de tenensa,  
Baissatz e sotz mes.

Ecar sai  
Pretz verai  
En vos, cui aurai,  
Domna, o'n morrai,  
Pretz mai car m'es en defes  
Que s'autra m'agues.

Be m plazo l'arquier  
Pres la barbacana,  
Quan trazo'l peirier  
E'l mur dezenvana;  
E per mant verdier  
Creis la ost e gensa.

E volgra l plagues  
Aital captenensa  
Lai al rei Engles,  
Com mi plai  
Quan retrai  
Co m'avetz ab jai,  
Domna joven, sai,  
E de beutat pretz conques,  
Que nous en falh res.

Et agra entier  
Pretz, cui quecx soana,  
S'ab aital mestier  
Crides sai : Guiana !  
E fera'l premier  
L'onrat coms valensa ;  
Quar sos sagels es  
De tan breu legensa,  
Qu'ieu non o dic ges.  
Mas dirai  
Que ab glai

Amors ai.  
Domna, que farai ?  
Si ab vos no m val merces  
O ma bona fes.  
Senhor gai  
E verai,  
Que s sap de tot plai  
Onrar, qu'ieu o sai,  
De Tolzan e d'Agenes,  
Malgrat dels Frances.

---